

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 15, No. 592

原始資料: 蕭鎮國大德提供, 日本 SAT 組織提供, 北美某大德提供, 三寶弟子提供新式標點

No. 592

天請問經

大唐三藏法師玄奘奉 詔譯

如是我聞：

一時薄伽梵在室羅筏國，住誓多林給孤獨園。時有一天，顏容殊妙，過於夜分，來詣佛所，頂禮佛足，却住一面。是天威光，甚大赫奕，周遍照曜誓多園林。

爾時彼天以妙伽他而請佛曰：

「云何利刀劍？ 云何礪毒藥？

云何熾盛火？ 云何極重暗？」

爾時世尊亦以伽他告彼天曰：

「龜言利刀劍， 貪欲礪毒藥，
瞋恚熾盛火， 無明極重暗。」

天復請曰：

「何人名得利？ 何人名失利？

何者堅鉀冑？ 何者利刀杖？」

世尊告曰：

「施者名得利， 受者名失利，
忍為堅鉀冑， 慧為利刀杖。」

天復請曰：

「云何為盜賊？ 云何智者財？

誰於天世間， 說名能劫盜？」

世尊告曰：

「邪思為盜賊， 尸羅智者財，
於諸天世間， 犯戒能劫盜。」

天復請曰：

「誰為最安樂？ 誰為大富貴？

誰為恒端嚴？ 誰為常醜陋？」

世尊告曰：

「少欲最安樂， 知足大富貴，
持戒恒端嚴， 破戒常醜陋。」

天復請曰：

「誰為善眷屬？ 誰為惡心怨？
云何極重苦？ 云何第一樂？」

世尊告曰：

「福為善眷屬， 罪為惡心怨，
地獄極重苦， 無生第一樂。」

天復請曰：

「何者愛非宜？ 何者宜非愛？
何者極熱病？ 誰是大良醫？」

世尊告曰：

「諸欲愛非宜， 解脫宜非愛，
貪為極熱病， 佛是大良醫。」

天復請曰：

「誰能覆世間？ 世間誰所魅？
誰令捨親友？ 誰復障生天？」

世尊告曰：

「無智覆世間， 世間癡所魅，
慳貪捨親友， 染著障生天。」

天復請曰：

「何物火不燒， 風亦不能碎，
非水所能爛， 能浮持世間？
誰能與王賊， 勇猛相抗敵，
不為人非人， 之所來侵奪？」

世尊告曰：

「福非火所燒， 風亦不能碎，
福非水所爛， 能浮持世間。
福能與王賊， 勇猛相抗敵，
不為人非人， 之所來侵奪。」

天復請曰：

「我今猶有疑， 請佛為除斷。
今世往後世， 誰極自欺誑？」

世尊告曰：

「若多有珍財，而不能修福，
今世往後世，彼極自欺誑。」

爾時彼天聞佛，世尊說是經已，歡喜踴躍，歎未曾有，頂禮佛足，即於佛前歛然不現。

天請問經